

淳南遺老集

三

知學
齋
藏
書

PDG

淳南遺老集卷之十五

淳南王若虛從之

史記辨惑七

字語冗複辨

舜本紀云瞽叟更娶妻而生象象傲瞽叟愛後妻子常
欲殺舜舜避逃及有小過則受罪順事父沒後母與
弟日以薦謹匪有懈後又云舜父瞽叟頑母嚚弟象
傲皆欲殺舜舜順適不失子道兄弟孝慈欲殺不可

得即求常在側字語重復而兄弟孝慈一句亦不成義理

周本紀齊世家稱武王觀兵諸侯不期而會盟津者八百諸侯諸侯皆曰紂可伐矣無乃剽諸侯諸侯字冗衛世家云宣公以子伋為太子令右公子傅之右公子為太子取齊女求入室而宣公見所欲為太子婦者好說而自取之何不但云宣公見其美而煩重如是乎又云齊女子朔譏惡太子伋宣公乃使伋于齊而

令盜撫界上殺之與太子白旄而告界盜見持白旄者殺之何若但云使伋子齊與之白旄而令盜于界上視持旄者殺之乎又云朔之兄壽知朔之惡太子而君欲殺之乃謂太子曰界盜見太子白旄即殺太子太子可母行何若但云知之以告太子使母行乎又云太子朔立是為惠公左右公子不平朔之立也惠公四年左右公子怨惠公之讒殺前太子伋而代立乃作亂語意重複但存不平朔之立一句足矣又

云翟殺懿公也衛人憐之思復立宣公前死太子伋
之後伋子又死而代伋死者子壽又無子此但云思
復立太子伋之後而伋子亦死壽又無子可也安用
許多字耶

趙世家云趙朔及程嬰謂公孫杵臼曰朔之婦有遺腹
若幸而男吾奉之居無何而朔婦免身生男多朔婦
免身字

子貢傳云子貢一出存魯亂齊破吳彊晉而霸越子貢

一使使勢相破十年之中五國各有變文意重複矣
越世家云莊生謂陶朱公長男曰若自入室取金長男
即自入室取金但云男即取之可也

曹沫為魯將與齊戰三敗北魯莊公懼乃獻遂邑之地
以和柯之盟沫劫齊桓公乃許盡歸魯之侵地既而
桓公欲倍其約管仲曰不可于是桓公乃遂割魯侵
地曹沫三戰所亡地盡復予魯但云桓公乃從可矣
何必重叠如此

孔子世家云其先宋人也孔防叔至叔梁紇禱于尼邱得孔子生而首上圩頂故因名曰邱云字仲尼姓孔氏既云孔防叔又言孔子生何必更注姓氏乎

鄭世家云孔子嘗過鄭與子產如兄弟云及聞子產死孔子為泣曰古之遺愛也兄事子產子謂言孔子為泣則聞字亦着不得或只云及聞其死泣曰更為簡省也夫既如兄弟而子產年長則何必復言兄事哉兼已死之後及此其次第亦不應爾

春申君言所幸李園女弟于楚王楚王召入幸之遂生
子男立為太子以李園女弟為王后楚王貴李園園
用事李園既入其女弟立為王后子為太子恐春申
君語泄而益驕陰養死士欲殺春申君以滅口自園
用事以下冗複重濁殆不可讀以精當律之當云園
用事益驕恐春申君語泄陰養死士欲殺之以滅口
楚考烈王卒李園盡滅春申君之家而李園女弟初幸
春申君有身而入之王所生子者遂立是為楚幽王

子謂遷先記李園女弟事既已詳悉備見于此但云
園女弟所生子立或直云太子立足矣何必費辭如
是

趙簡子疾五日不知人既寤語大夫曰我之帝所有一
熊欲來援我帝命我射之中熊熊死又有一熊來我
又射之中熊熊死子謂中熊字不須要中熊事但云
我又射殺之可也

趙襄子滅智伯豫讓曰智伯知我我必為報仇而死以

報智伯則吾魂魄不愧矣多以報智伯字

石奢為楚相行縣道有殺人者追之乃其父也縱其父而還自繫焉但云縱之可也

趙奢傳云廉頗之免長平歸也失勢之時故客盡去免歸即失勢時也何必再下此句

魯仲連傳云仲連游于趙趙孝成王時秦兵圍邯鄲魏安釐王使客將軍新垣衍間入邯鄲因平原君謂趙王曰趙誠發使尊秦昭王為帝秦必喜罷兵去平原

君猶豫未有所決時魯仲連適游趙會秦圍趙聞魏
將欲令趙尊秦為帝乃見平原君曰云云此文理重
複但云仲連聞之乃見平原君可也仲連謂新垣衍
曰吾將使秦王烹醢梁王新垣衍曰噫嘻亦太甚矣
先生之言也多先生言字必欲存之當在太甚字上
聶政欲為嚴仲子刺韓相俠累仲子請益車騎壯士為
輔翼政言不可遂謝車騎人徒聶政乃辭獨行伏劍
至韓多聶政乃辭四字又云刺殺俠累因自皮面決

眼自屠出腸遂以死何必遂字又云韓取聶政尸暴
于市購問莫知誰子于是韓購縣之有能言殺相俠
累者予千金久之莫知也政姊嫫聞人有刺殺韓相
者賊不得國不知其名姓暴尸而縣之千金乃於邑
曰云云但言政姊嫫聞之于邑豈不簡快乎又曰市
行者諸衆人皆曰此人暴虐吾國相多諸衆人字
李斯出獄與其中子俱執顧謂其中子曰多下其中子

三字

張儀傳云昔趙襄子令工人作為金斗長其尾令可以
擊人與代王飲陰告厨人曰即酒酣樂進熱啜及斗
以擊代王殺之但云厨人如其言擊殺之

范睢傳云須賈謂范睢曰非大車駟馬吾固不出范睢
曰願為君借大車駟馬于主人翁范睢歸取大車駟
馬此當云願為君借於主人翁即歸取車馬

項羽紀諸侯無不人人惴恐無不人人字意重

項羽紀云漢王與韓信彭越期會擊楚軍至固陵而信

越之兵不會張子房曰君王能自陳以東傳海盡與韓信睢陽以北至穀城以與彭越使各自為戰則楚易敗也漢王乃發使者告韓信彭越曰并力擊楚楚破自陳以東傳海與齊上睢陽以北至穀城與彭相國此當云發使者告之也

留侯世家云良與客狙擊秦皇帝秦皇帝大怒大索天下求賊甚急為張良故不須言為良意

淮陰侯傳云漢王欲拜信為大將諸將皆喜人人各自

以為得大將多各自字至拜大將乃韓信也一軍皆驚此但當云至拜一軍皆驚

曹相國世家云卿大夫已下吏及賓客見參不事事來者皆欲有言至者參輒飲以醇酒來者至者重複又云相舍後園近吏舍吏舍日飲歌呼從吏惡之無如之何乃請參遊園中聞吏醉歌呼從吏幸相國召按之曷若但云乃請參遊園中幸其聞而召按也

叔孫通以惠帝作複道勸之立原廟上乃詔有司立之

則立廟之由已自見矣而復云原廟起以復道故此句安用哉前漢削之當矣

陳丞相世家云始陳平曰我多陰謀是道家之所禁吾世即廢亦已矣終不能復起以吾多陰祠也然其後曾孫陳掌以衛氏親貴戚願得續封陳氏然終不得多兩然字吾多陰祠一句亦不須也

賈生傳云懷王隨馬而死無後賈生自傷為傳無狀哭泣歲餘亦死賈生之死時年三十三矣不必再言賈

生之死

馮唐言李牧之事云當是之時趙幾霸其後會趙王遷立其母倡也王遷立乃用郭開讒卒誅李牧再言王遷立何也

張釋之傳文帝問上林尉諸禽獸薄尉左右視盡不能對虎圈嗇夫從旁代尉對上所問禽獸薄甚悉止云從旁代對甚悉豈不善乎

張釋之傳有人盜高廟坐前玉環捕得文帝怒下廷尉